

摘藻堂四庫全書薈要

集部

欽定四庫全書薈要

集部

圭塘小藁卷九

十

詳校官助教臣謝登雋



欽定四庫全書纂要卷一萬六千三百十九
集部

圭塘小藁卷九

元 許有士 撰

碑志

勅賜推誠宣力定遠佐運功臣太師開府儀同
三司上柱國曹南忠宣王神道碑銘 并序

曹南忠宣王薨六十年若乃祖乃父豐功高烈墓道之
石咸未有紀至元六年歲在庚辰十二月己亥中書右

丞相臣托克托左丞相臣特穆爾布哈等以聞勅中書參
知政事臣有壬為銘翰林學士承旨臣庫庫為書翰林
學士臣玄篆其額臣有壬承命兢惕而竊又自幸皇帝
不以臣庸劣俾叅台司而王之子臣托歡寔平章政事
世講義篤當悉其世家飭其未至以章眎來世矧威命
有赫其敢以弱陋辭王諱阿老罕蒙古札拉爾氏祖諱
博綽贈定威佐運功臣光祿大夫司徒上柱國追封曹
南王謚忠定父諱伊埒肯贈忠宣靜遠佐運功臣金紫

光祿大夫中書右丞相上柱國追封曹南王謚桓毅祖
妣塔本妣默埒俱追封曹南王夫人忠定幼宿衛太祖
皇帝服弓矢割烹征屢有功竟死於戰桓毅嗣宿衛事
雅爾堅太子從庫克楚瑚土克圖太子伐金遂侵宋以功陞
萬戶尋以天下馬步禁軍都元帥副大將軍察罕征討
察罕沒遂代之統大軍攻淮東西諸城至廣陵戰沒王
嗣職統其軍已未從世祖皇帝渡江破宋師隆興北山
還上都賜黃金五十兩中統初詔將所部討阿拉克岱爾

呼爾都海追至河西有功二年從征阿哩克布克賜金服一
文繒九三年從宋王噶必齊討李璫賊搃老僧口日夜
搏戰走之奪其輜重進拔濟南賜金鞍文錦各一黃金
如上都數四年春錫虎符銀章至元四年有事襄陽走
宋師安陽灘賜白金衣物五年大軍圍襄樊分成百丈
山以倚宋師戰屢捷十年拔襄樊十一年畧地郢復奪
郢州南門堡視地勢可達戰艦于江遣錫喇瑪勒白大將
自沙蕪口入江取郢州沂江陵復遵陸畧地至鎮江十

二年擢昭毅大將軍仍蒙古軍馬上萬戶權行中書省

事駐建康與右丞相巴延叅政董文炳為三道水陸分
進期集臨安王以右軍取道獨松關破東壩砦至護牙

山遇宋師手斬其將杜總管獲甲盾數百入漂陽界復

值宋師斬騎將二人禽裨將祝亮等四十二人斬首三

千級進拔漂陽獲首虜七千戰章步橋斬其將吳奉使

斬首三千級進攻建平破之斬吳許兩總制拔廣德西

安長興攻獨松關禽谷總制至柏市禽其將張八斬首

二千級進中奉大夫行中書省叅知政事十三年三軍會臨安宋亡九月徇浙東未下郡邑所至納款降趙提刑等五百餘人追宋宗室秀王與擇于閩至福安轉戰四十餘里殺其步帥觀察使李世達於陣俘與達及其子弟監軍趙由懽防禦使林德獲印章五器仗萬計撫使王吉等皆望風降偏師入興化禽宋相陳文龍招降宋官二百餘人淮兵三千人江南平十二月以行中書省叅知政事行江東道宣慰使十四年入覲進資善大

夫行中書省左丞仍宣慰使十六年進資德大夫行中書省右丞使如故十八年入覲賜玉帶弓矢進光祿大夫中書左丞相行中書省事統師四十餘萬征日本次明州而薨年四十有九是年十月吉日葬曹州濟陰縣郭村之原初贈協謀佐理功臣太師開府儀同三司上柱國曹國公謚武定加贈推誠宣力定遠佐運功臣太師開府儀同三司上柱國追封曹南王謚忠宣配托多固庫勒呼圖克台並封曹南王夫人子男二曰伊遜岱爾

襲左手蒙古萬戶天歷初有擁護功遂叅預河南省三
轉知樞密院出為河南省平章政事兼山東河北蒙古
軍大都督入為集賢大學士進銀青榮祿大夫薨曰托
歡起家同知蘄州又四轉為河南左丞由南臺侍御史
再遷為西臺御史中丞母疾棄官歷江西湖廣江浙三
省平章政事進階光祿大夫拜南臺御史大夫改河南
平章以母老辭至元六年拜中書平章政事在政府念
母老而遠語及輒流涕南臺總十道按三省非重臣不可

復拜御史大夫且便其養也女五人適管軍總管呼喇
珠珪齊衛副使巴哈穆爾蒙古軍千戶塔齊爾真定路總
管哈喇哈遜蒙古右萬戶額爾吉納孫男女若干皇元
以仁武取天下艱難肇造與共事者惟國人爾而國人
中尤賴以濟者若扎拉爾氏則四傑之一焉王之乃祖
乃父無征不從無戰不捷而所部之士威信素著如臂
使指無不如志天下既一俾率其部而世其職雜居心
腹之地以制四方世祖皇帝萬世之遠圖也王明而恕謀

而有斷始襲其部士皆樂為之用提兵鼓行指期制勝
其追叛河西攻堅歷下力戰襄樊畧地郢復可謂雄偉
之績矣若夫卷甲沙蕪而長江失天塹之險分節獨松
而重關若無人之境卒使宋主面縛海隅風靡則無忝
爾祖而世篤有加焉日本之役未至而薨厥後蹉跎貽
悔議者謂使王在當不至若是也皇元屈羣策以一區
宇舊勞之臣耆艾熾昌者非一王暨祖考皆死戰陣以
致寧敕乃身不享之昔賢謂世德之臣厚施而不食其

報然後其子孫能與守文太平之主共天下之富王壽
不滿其德而二子佐列聖重熙之運皆致位崇極王薨
甲子一周矣賜銘墓道哀榮益新又立祠建康賜祭田
千畝世福蓋未艾也嗚呼崇德報功朝典縟矣歸美報
上獨不在王子孫乎臣有壬謹再拜稽首為之銘曰

於赫天造秉鉞四馳芟夷蕪梗以式九圍河嶽喬巍
胄接武闕如奮出奔走禦侮桓毅之子忠定之孫率我
舊部勗我鋪敦帝命南伐潰襄拔郢夷庚既塞我旅爰

整嘽嘽匪車舟乃陸通投鞭斷江率潁而東三軍犄角
分趣吾會遂啓漂陽肆我禡類崩角稽首漿壺食簞廣
德弗城獨松弗闕大會臨安組頸道左乾坤清夷四方
來賀蕞爾島夷乃敢不庭皇風播海長星墜營訐訐郭
原鬱鬱王兆焯勤崇極申以廟貌既歷五紀盡文其碑
亦惟天道遲速有時假寵九原追功未墜聿聲其休永
錫來裔

有元功臣曹南忠宣王祠堂碑

至正元年二月乙酉中書臣僚言勅建曹南阿老罕祠
禮官議視淮安忠武王而祠於集慶縣官給其費且請
賜田千畝以奉祭祀制曰可既月王之子托歡由中書
平章政事拜御史大夫行臺江南臺治集慶又得躬相
厥役以迄於成貽書有壬曰子嘗承詔銘先王知先王
莫如子祠落矣願有紀也讓不可乃本其碑擷其家世
履歷勲庸之槩曰蒙古扎拉爾氏有贈定威佐運功臣
光祿大夫司徒謚忠定諱博綽者王祖也贈宣忠靖遠

佐運功臣金紫光祿大夫中書右丞相謚桓毅諱伊埒
肯者王考也勲皆上柱國爵皆曹南王身皆死於戰有
大功祖妣塔本妣默埒皆封王夫人此其家世王沉毅
善戰襲桓毅職中統四年錫銀章虎節仍上萬戶至元
十二年擢昭毅大將軍以上萬戶權行中書省進中奉
大夫行中書省叅知政事明年以叅知政事行江東道
宣慰使明年入覲陞資善大夫行中書省左丞十六年
進資德大夫行中書省右丞仍宣慰江東十八年入覲

拜中書左丞相行中書省事階光祿大夫征日本次明
州而薨壽四十九葬曹州濟陰縣郭邨累贈推誠宣力
定遠佐運功臣太師開府儀同三司上柱國追封曹南
王謚忠宣此其履歷歲己未渡江破宋師於隆興北山
中統初討阿拉克岱尔呼尔都罕於河西明年扈征阿哩克
布克於幕比明年從宋王平李璫於濟南四役皆有奇功
賜黃金金箠金鞍文錦恩數稠疊至元四年觀兵襄陽
明年圍之越六年克之始走宋師安陽灘中綴宋師百

丈山卒與策勲焉十一年畧地江北奪郢州南門堡獻
盪舟之策渡沙蕪取鄂州泝江陵至鎮江十二年與淮
安忠武王右丞相巴延分道取宋王發建康道與宋師
戰屢敗之破東壩砦拔溧陽建平廣德西安長興攻獨
松關前後斬首一萬五千級殺其將杜總管吳奉使許
吳二總制及騎將二人俘谷總制張知府裨將祝亮等
四十二人十三年三軍會於杭宋亡徇浙東降趙提刑
等五百餘人追播福安僵尸四十里殺步帥李世達俘

秀王與擇監軍趙由懌防禦使林德降安撫使王吉分
軍興化禽宋相陳文龍降宋官二百餘人淮兵三千人
江南遂平此其勲庸配托多固庫勒呼圖克台並封王夫
人子男二長伊遜岱爾銀青榮祿大夫山東河北蒙古
軍大都督集賢大學士次大夫也女五俱適望族有壬
惟古者功臣受封之國先建宗廟於路寢之東所以廣
孝而勸忠也諸侯之制二昭二穆與太祖之廟而五太
祖百世不遷昭穆則視親盡而遞遷之自漢以來諸侯

鮮及十世身享崇爵而子孫不能保也廟制由是而不講矣其有德及生民功施社稷者在朝廷則有圖形以寓其思賢念功之意在其臣吏則有建祠以盡其事亡如存之心亦因時制宜之義也諸葛武侯之沒所在求為立廟又請立之成都後主皆不聽民至私祭陌上以武侯之功尚何靳於一廟豈欲黜私祭以崇正禮邪夫所在立廟若汎立之成都亦復不聽何哉至習隆向充之請始聽立廟沔陽則武侯之得廟亦憂憂乎其難哉

皇上於忠宣既立之祠又錫之田思賢念功之盛德豈
區區蜀禪之所知哉大夫祇順德意克篤前徽勸孝勸
忠於是乎在皆可歌以薦者也乃為之詩俾歌以徹豆
薦其辭曰

乾元統天乘六龍宏材碩德如雲從忠宣天挺間世雄
父菑子播昏作農帝曰來汝汝世忠奮戈無往不奏功
方城碩碩際皇風分兵掎角乘其墉沙蕪飛渡星月蒙
順流震擊無遺鋒義旗禮干趣獨松趙孤銜壁吳山空

萬邦玉帛四海同台司兩輅昭報功虎符龍節行江東
倭奴何物勞蒙衝魂升海隅心九重揚顯有子能始終
哀榮典冊備且隆袞裳旒冕曹南封石頭城高江流淥
新廟奕奕摩蒼穹圭田千畝畝且鍾維糜維芑紛糝種
春榆釋烝簋有饌醇醲載裸牲特豐樂脩武兮明禮容
神保假兮福祿降象賢世美垂無窮

大元故翰林學士資善大夫知制誥同脩國史
賜推忠守正亮節功臣資政大夫河南江北等

處行中書省左丞上護軍追封魏郡公謚文肅
暢公神道碑銘

恭定丙寅翰林學士資善大夫知制誥同脩國史暢公
薨十年矣制贈資政大夫河南江北等處行中書省左
丞上護軍追封魏郡公謚文肅又十年加賜推忠守正
亮節功臣官勲如故伯子江東道廉訪副使篤將侈君
之賜灼公之善範後之承也諗其友許有壬叙而銘之
碑叙曰公諱師文字純甫上世居汴公生洛陽大父淵

贈中順大夫上騎都尉魏郡伯配田氏贈魏郡太君父
訥叅汴侯幕一府服其賢注地理指掌圖有詩名公幼
警悟貧無書手抄口誦甫十五博覽經史弱冠謁魯齋
許先生先生賓遇之高弟若姚公端甫高公道凝皆相
推友善中原底定慨然有志於世上時政十六策受知
丞相安圖補右三部令史丞相已延南征選為省掾從
攻揚州常州下蘇秀臨安歸裝獨載書籍無一長物編
平宋實蹟上之初官承事郎行樞密院都事重慶叛竭

謀畫諾諸城相率內附安西王承制改四川北道宣慰
司經歷尋除承直郎潼川路治中拔寒畯王朝綱王伯
寧韓伯昌為府史後皆至達官脩府治發地得白金五
十錠同僚分公十錠公獨不受以脩廟學傳舍餘作酒
器給公用承制改同知保寧路事治尚平簡反側以安
擢僉四川道按察司事世皇知其賢詔所至毋敢沮撓
給三傳赴上至則摘姦雪寃興學除弊風采一變有旨
若曰暢純甫不貪佳士也其令與臺臣伊蘇特穆爾為

侶遂拜監察御史糾劾權貴憲綱肅然上所纂農書遷
陝西漢中道巡行勸農副使置義倉教栽植闢荒田農
事以興俄僉陝西道按察司事時按察改廉訪司精汰舊
官獨副使盧公處道暨公仍舊興元監軍怙勢肆虐得
其贓奏決之移僉山南道枝江歲防水役衆往返四百
里供給尤苦公以江水安流悉罷其役亦都護駙馬之
徒大為民害繩其尤者流之改僉山東道入為國子司
業教育有規諸生服焉除陝西行省理問始至決滯訟

三百餘事若右丞圖們岱爾之訟家財宣使鞏士安之
箠折民齒開成同知張德昭之利女財而奪之歸皆强
悍有恃官不能制者併寘於法引疾歸遷太常少卿轉
翰林侍讀學士知制誥同脩國史成宗賓天武宗撫軍
朔方仁宗淵潛覃懷而中官属意安西宰相知其不可
乃集館閣議以察向背公與焉即颺言曰此宗社重事
詎宜苟且衆皆默然又曰余病矣請歸調治遂拂衣而
起仁宗入京始出視事草至大改元詔脩成宗實錄賜

中統楮幣為定一百加少中大夫請郡除太平路總管
兼為勸農事歲旱當禱公曰聞先旱必哀於民天可欺乎
乃捐俸致禱不日沾足當塗民坐殺牛祈雨囚械者六
十餘人公惻然曰雨暘愆期守令責也民殺牛致雨爾
縱不愧於心尚忍聽其訟乎即破械出之舟有汧流觸
公流之舟致溺其人累讞不決公亦縱之吏持不可上
其議憲司卒是公議秋米收貯盈屋公曰吾家人能盡
此乎呼寒士小民恣其取去分憲至郡必謁公曰治內

無事此來行故事爾至屬邑曰暢先生治內何敢久留
後守為之立祠於學召為翰林侍讀學士階中奉大夫
勅撰王勃成道記序等文賜白金兩錠不受尋除燕南
河北道肅政廉訪使視事五月歸中書遣編脩官富珠
哩朶奉翰林學士之命以請起至汴以疾歸延祐四年
丁巳秋主河南鄉試歸次襄縣西顧長安發丘壟之歎
因感疾十月朔薨於縣之傳舍某年某月某日葬於襄
縣峴山之原配移刺氏上世遼貴族佩金虎符萬戶某

之女先公二十年卒兩封魏郡夫人三子長篤也廕淮

安路判官轉將作院經歷拜西臺御史移南臺陞都事

除江浙行省員外郎改僉山東道廉訪司事入為監察

御史階太中大夫為今官娶李氏子六人勉國子上舍

生年二十七卒勤劬勵勤勁皆幼女五人次曰騫不仕

娶成氏子勛女一人次曰駿娶蒙古氏子四人勗勗助

勝篤駿魏郡夫人生騫曹氏出也至元之初際興王之

運得賢為盛而文學之士措諸有政拔出流俗藉其在

世若魏公者混一來可數也公制行孤潔足以俯視一世立志高遠足以上追古人天下之人莫不驚歎以為異人而不知者造訕騰議公亦不恤也若夫從南征而垂索歸得地藏而用諸官屢辭上請盡揮祿入雖公小節而其胸次為何如哉高公彥敬為山南副使移文言不可居公上者三謂公官五品先十餘年不可犯積薪之誚渡江孰不富貴至今家僅僅數口寒士無異勢利無一動其心高節清風殆不可及且兄事三十年義雖

朋友愛如同生一旦岸然其上實不自安犯此三不義
何以糾人之非即日辭去觀此則當時俗化之美風節
之高公之所以致此者可知已朝為侍吏暮徼倖躡數
級傲然為長吏為同列者聞二公之風亦可少愧哉公
作守得古循吏體執憲有古遺直風至於立朝抗論不
恤利害則其較著者也其為學宜專館閣備顧問而中
外十轉始為國子司業又出為陝西理問入翰林才一
轉官尋又出守再除翰林則老矣豈一時人才之多耶

一技一能與不能操觚而專局至通貴未止者則又有
命也邪然而列聖知遇多士推服太史有錄太常有謚
加贈有號而又承家有子則天於公亦厚矣讀書一過
目即不忘假友人宋長編不決日反之友訝其易公曰
予舊熟之有忘者申之爾記僻事數十驗之應答如響
為文力追古作盧公處道以為似太史公而姚公端甫
亦稱純甫實善文著述多而不存藁副使所萃才十一
爾其見於世者不專於文也銘曰

魏公之出際時淳興挾策見世淵儲遂騰宋木漸傾蜀
蔓有芳簡牘既資贊益惟弘陶之不櫛撫之不絰以隄
厥潰以撤厥弼壁求簡編土視金縢皇皇使車爰七其
乘善則爾揚愆乃爾繩學政聿脩郡績載凝掌帝之制
適天之夢大議不屈長江可溯名日山重家不縷增歸
來自樂飲水曲肱有介如石有潔如水峻如絕壁孤如
秋鷹弛張翫世中別淄澠夷考具行不渝九徵聞公之
風貪懦自懲宰木已拱恩光日昇漢江汪洋峴首峻嶒

元凱多事慮及谷陵惟德惟神有懔威稜景而前脩昌
而後承登世於千物莫我敢較

五龍廟碑

龍於天地間為物最神乾首六十四卦獨是取象其以
神變不測時乘御天雲行雨施烝民乃粒功莫與京乎太
塞堪輿小為蠶蠋能短能長能幽能明者神之末也管
子曰龍水之神者也乘水則神立則雖神物其亦擇所
可依而後能神其神哉江河湖海固其家也天下之曰

潭曰湫曰巖曰洞曰池者非一必皆幽深僻險有水可依而後居焉土人往往時見光怪不敢褻也而又早暵有禱則從而祠焉彰德路安陽縣西北五里洹水之陽有五龍廟廟之下水黑而深洹水至是瀦而後泄其龍居之淵乎太原元裕之效虞初書言明昌中風拔廟樹印地有跡事頗涉恠而不及廟之建始何時其號五者具五方為象設爾以其禱之屢孚也路達嚕噶齊荀公凱霖同知阿拉克判官穆爾展嘗脩其廢築臺其前至元

四年戊寅夏旱甚甫事請禱六月二十日甲申總管杜公德始下車憂惶無措曰不才之來丁旱之會又數日不雨則苗盡槁人何食賦何徵責何以追盍走靈祠而禱諸荀公曰五龍廟效靈自昔協恭精禱神其閔乎於是率僚屬齋沐具香幣禱焉戊子行事雲俄起是夕微雨越翼日大作三日乃止苗之槁者淳而興市之閉遏者發人之轉徙者息病者以蘇訛言以寂豐凶笑顰變乎旦夕既報祀安陽縣尹趙君時敏刻石以昭神貺以

遠邦君之休夫龍與人異處昔鬪涓淵子產以為吾無
求於龍龍亦無求於我惟其無求則子產之言是已為
天牧以守其土以養其民以供其貢賦而歲將告饑人
將轉死苟可弭菑當即致其極則其能無求於龍乎且
龍之託於茲水以神其神人象而祠之有年矣應捷桴
鼓亦其宜也否則將不與搏土縛芻等哉抑聞之雨由
乎神而亦由乎人至誠貫金石信及豚魚况龍之神人
之誠有不格者乎然而龍之德不可忘也祭法曰山林

川谷丘陵能出雲為風雨見恠物皆曰神洹水有龍龍
能出雲為雨祠亦宜哉書其槩申以迎送神曲俾祀而
歌焉其詞曰

洹之水兮沖澍祠其渙矣兮惟其漑羗自珍兮神龍湯
擇勝兮實所宮魑之虐兮蘊隆龜吾田兮槁吾稂種將
竭澤兮及爾躬哀吾民兮疲瘞忍及喙兮弗充龍之怒
兮奮飛豐隆前驅兮屏翳後隨騰清波兮淋漓沛為霖
兮鮮厥萎報祀兮孔時冷風肅兮滿旗鼓坎坎兮吹參

差荷神嘉兮無期

膏澤施兮不屯苗其傑兮木欣欣牲之腍兮醪之醇琮
深席靚兮縈燎薰享不儀物兮享以人龍之去兮逡巡
噓雲氣兮氤氲歸九淵兮深藏斂大惠兮庇一方時潛
飛兮則其常有扣斯應兮惟爾之臧百穀充羨兮遺秉
在田龍兮龍兮人不爾諼

勅賜興元閣碑

太祖聖武皇帝之十五年歲在庚辰定都和林太宗皇

帝培植煦育民物康阜始建宮闕因築梵宇基而未屋
憲祖繼述歲丙辰作大浮屠覆以傑閣鳩功方殷六龍
狩蜀代工使能倅督絡繹力底於成閣五級高三百尺
其下四面為屋各七間環列諸佛具如經旨至大辛亥
仁皇御天聞有弊損遣延慶使吹斯絃輦輦之又三
十一年為至正壬午皇上念祖宗根本之地二聖築構
之艱勅怯忭府同知今武備卿布達實哩暨嶺北行中
書省右丞令宣政院使伊呼特穆爾專督重修歷四年

方致完美周塔塗金晃朗奪目閣中邊頂踵巨細曲折
若城平髹堊靡不堅麗精至重三其門繚以周垣煥乎
一新縣官出中統楮幣為緡二十六萬五千有奇費視
昔半而功則倍之丙戌十一月七日上御明仁殿中書
省臣奏閣脩惟新不可不銘勅翰林學士承旨臣有壬
文諸石臣有壬拜手稽首而言曰天地運用之妙臣無
得而名焉即其形之近者言之風雷雨暘之散動潤烜
發生萬物者皆自上而施於下源泉陂澤之流通抒泄

灌溉大田者亦由高以及乎卑我國家興王之地俯瞰
萬國大聖人首出庶物位乎天德引閼孽萌紐牙開闢
而後蓄而未發之氣以資始品彙自上而施於下由高
以及乎卑故澤之流若高屋之建瓴師之出如太山之
墜石功烈之成登三邁五漢而下莫我儼也定都和林
造邦之基立矣太宗憲宗雖干戈間而以不嗜殺人為
心聞象教清淨覺皇慈仁之旨有契宸衷資其說以格
蚩蚩之未格者非大示尊崇則無以為感觸之地而大

聖人壘空四海撮土八埏囊括宇宙席捲河山之量寔
兆朕於是焉臣有壬生長熙洽之世朔南名利罔不歷
觀聞嶺北人譟閣之大竊疑其夸質諸嘗行陝蜀江廣
閩浙且仕嶺北之人信天下之閣無與為比也昔祇桓
寺基八十頃一百二十院祇陀須達二人成之我國家
富有四海視布金之地特錙銖爾則此閣締構之俊偉
傑峙與雪山相高驚嶺侔盛宜也閣始無名但以大閣
寺著稱皇上賜名曰興元之閣蓋經始之日實我元順

天應人龍興之初名協於實矣且和林自元昌路為轉
運司為宣慰司又為嶺北行中書省丙辰迄今九十一
年而列聖駿極之蹟雄都瑰異之觀無一人一言及紀
述者一旦形諸玉音刻之堅珉遲速其亦有緣乎於戲
休哉為大利益可量也夫銘曰

鴻蒙再闢世再初聖神立極卑黃虞建都乃握天地樞
俯拾萬國如墜枯磬磬赤子饑待哺后奚後我來具蘇
天戈豈欲專天誅心以不殺人自孚願茲象教非虛無

與我異世而同符以大智慧明羣愚開極樂國包寰區
祇園方欲鳩其徒乘龍遽爾及鼎湖後聖繼作志不渝
巍巍成此堯率居不宏其規豈遠模矗天拔地高標孤
中有屹立金浮屠諸佛環擁分四隅至大脩廢走使車
三十一年等須臾吾皇法祖恢聖謨坐令金碧新渠渠
厯恩覆疇均堪輿如閤容塔綽有餘中書有請帝曰俞
汝臣有士其大書不騫不磷磐石如億萬斯歲綿皇圖

武昌路武當萬壽崇寧宮碑銘有序

武當均州山先名太和道流謂其峻極秀絕非玄武神
不足當故更名武當勝國端平甲午兵搖襄漢均民走
鄂深神德不能忘鳴於官行武當祠於鄂為冲霄壇制
使孟珙禱於神有齊安之捷易壇為觀盖復崇寧額也
我皇元至元庚寅升武當萬壽崇寧宮地據雄峻鶴山
亘其後大江朝其前雲關扃深石磴梯危大殿高堂傑
閣危亭長廊縈帶通樓環匝百神胥宇羽流栖息壇壝
鼓鐘學館庖廡輶輳錯布仰觀樓閣玲瓏在五雲絕頂

俯瞰萬間鱗集煙靄蔽虧若洞庭觀波濤目為之眩而
山川形勝闐闐盛麗金碧丹雘高下相輝玉京十二樓
不得而見之此亦人境之洞天也泰定甲子又改作玉
皇閣凡十二丈深廣相若由甲午迄至正甲申一百一
十一年壇而觀觀而宮若葺故若建新幾人幾日幾工
幾木而甲申之二月戊午掃於一炬洞真明道冲妙真
人住持提點兼領諸宮觀事羅君大震職宮事餘四十
年勞瘁已至時當弛擔而彼所謂劫運乃丁其會常情

體解氣沮方偕其徒曹大坤等以已資率衆力任其復
而威順王實鎮是邦主贊尤恪重起兩廡甲子樓三十
一間以其下內半為雲房歲丁亥三清殿成深廣十尋
高九丈加舊制三之一又建玄天上帝殿聖像侍從供
罷靡不傷功而又作亭礮石以紀綸綍運機為藏以待
禴禳餘凡締構日以就緒矣昔閣之成嘗屬予記亡友
玄教大宗師閑閑吳公亦屢為言時待罪政府多事因
循遂至今日乃已丑八月書來告其掇拾煨燼有成仍

命予志夫所謂劫運者吾儒所謂數也天地且有數人
力之盛神靈之託其能出天地之外者乎其成其毀有
不必究者已玄武之祠昉宋真宗我朝至元己巳龜蛇
見於高梁河以為玄武之祥為築昭應宮於是武當之
山若增而高矣是宮之名雖主玄武而巍然南面朝五
帝者實主玉皇玄帝五帝之一也若夫北方七宿為水
之神寓形龜蛇者世既聞矣主之大者蓋寧厥旨玉皇
禮家所謂昊天上帝也以形體言之謂之天以主宰謂

之帝以功用謂之鬼神以妙用謂之神主宰者不離乎
功用而能妙用者也日月之運行風雷之鼓舞山川之
流峙人物之生息皆功效之著者闔且闢於斯往且來
於斯視之而不見聽之而不聞則有妙用存焉先王之
有天下也以為萬物本乎天故祀於郊圜丘以象其形
蒼璧以象其色樂九變以著其數猶曰維天其右之其
之為言不敢必之辭也不特此也群祀亦然或求諸陰
或求諸陽不可方數徵形狀索也自神仙好樓居之說

行遂有作崇臺傑觀以候之者嵩呼之聞巨跡之見真
若可以形聲相接而像設濫觴於此矣其始也施之羣
祀其卒也於上帝亦冠裳而宮室之矣聖人以神道設
教上智昭昭無幽不通下愚蚩蚩既顓而蒙孰為民彛
孰為帝衷可使由之而不能使之知也今號於衆曰帝
以主宰言其不啞然笑者幾希孰與樹中天之華構揭
上帝之高居使瞻而仰之者舉手加額曰上帝臨汝無
貳爾心由是而舍惡從善之心油然而生矣是宮之建

顯命靈躅祝釐民者固自有在而使民觀感日遷於
善聖教之助不又多矣乎銘曰

岷江東涘鄂城西壁疊巘嶸嶸崇宮仡仡天闕失守灰
飛瞬息剝殘碩果復根定力噓蜃倏樓琢璇俄室三華
屹岵九光赫奕雕梁龍矯文瓦鱗集棟吻雄鰲闌腰雌
霓踈櫺綺結飛簷翠濕碧霞騰虛流雲洞闢屏翳擁幢
豐隆列戟桂漿醺素蕙肴蒸碧靈霜清厲廣樂翕繹瑤
草肥露玉華酣日紫芝已甲蟠桃行實祥鸞朝朝瑞麟

夕夕元龜左顧靈蛇右翼山川開朗神人愉懌物具阜
康世允寧謐丕冒神休永奠人極

圭塘小藁卷九

欽定四庫全書薈要卷一萬六千三百二十

集部

圭塘小藁卷十

元 許有壬 撰

碑志

勅賜故資德大夫御史中丞贈擴忠宣憲協正
功臣河南行省右丞上護軍魏郡馬文貞公神

道碑銘

并序

至正七年七月丁丑集賢侍講學士通奉大夫兼國子

祭酒臣天爵言故資德大夫御史中丞贈摠忠宣憲協

正功臣河南行省右丞上護軍追封魏郡公謚文貞馬

祖常早擢高第歷踐要途始終五朝有文有政宜賜碑

紀德庸示報功集賢院以聞制可命臣有壬為文臣玄

為書臣起巖篆其額三人皆文貞公同年進士而有壬

託知尤厚始以學士被命繼冒承旨皆職紀述其敢辭

公字伯庸世永古特部居靜州天山有錫喇濟蘇者高祖

也金季為鳳翔兵馬判官死節贈桓州刺史廟賜褒忠

子孫因官以馬為氏曾祖烏喙訥從世皇征宋留汴掌
饋饗累官禮部尚書贈推忠宣力翊運功臣僉樞密院
事謚忠懿祖世昌行尚書省左右司郎中贈嘉議大夫
吏部尚書父潤朝列大夫同知漳州路總管府事贈中
奉大夫河南行省叅知政事追封梁郡公妣楊氏追封
梁郡夫人梁公官浮光因家焉公七歲知學得錢即以
市書十歲見燭歌燒屋解衣沃水滅之人嘆其異蜀儒
張公順講經儀真公未冠質以疑義數十張公竒之科

舉詔下鄉會試皆第一廷試第二蓋以國人冠也授應

奉翰林文字承事郎同知制誥兼國史院編修官拜監

察御史仁皇久正宸極猶居東宮近侍利燕飲得請公

抗言當御正衙立朝儀御史執簡太史執筆雖有懷姦

利已乞官賞者亦不敢出諸口承天地祖宗之重當極

調攝至於酒醴近侍進御當思一獻百拜之義英廟為

皇太子請慎簡師傅下至臣僕亦宜精擇時大姦當國

公首知其盜觀國史洎同列疏其十罪仁廟震怒罷之

黨與之布要地者皆論列黜之端人昔與牴牾而擯斥者請拔用之秦州山移公言山不動之物而今動之豈在野有當用不用之賢在官有當言不言之佞大臣皆家居待罪薦賢拔滯知無不言改宣政院經歷月餘辭歸起為社稷署令罷雜事於泉南大姦復相左遷開平縣尹欲中傷之退居浮光大姦死除翰林待制泰定建儲擢典寶少監太子左贊善尋兼翰林直學士成均釋奠陳太子視學之禮內出禮幣命公助祭除禮部尚書

祖母張夫人卒護喪歸起為右贊善復禮部尋辭歸天
歷初再使召為燕王內尉仍入禮部兩知貢舉一為讀
卷官時號得人叅議中書省事叅定親郊典儀充讀祝
冊官禮成賚金幣拜治書侍御史賜犀帶及御書奎章
閣記內庭宴服七襲金玉腰帶各一改徽政副使拜南
臺中丞今上即位召議新政賚白金為兩二百楮幣為
貫萬金織綺為端四改同知徽政院事拜御史中丞以
公疾特免朝禮命光祿日給上尊知經筵進說必陳經

史大義叅以祖宗故實持憲務存大體西臺御史劾其僚禁酤時面有酒色以苛細黜之山東憲以孔氏訟聞以事關名教不行按者亦引去司憲有以貪墨敗沒入其田廬請歸曲阜林廟從之拜樞密副使居無幾辭歸復南臺中丞遷西臺疾不赴積階自承事郎至資德大夫至元四年三月丙午薨於光州之第得年六十是年四月壬申葬州北平原鄉西樊里有司以聞有令贈諡配索氏封梁郡夫人子男二武子承事郎湖廣行省檢

校官文子徵事郎秘書監著作郎孫男三女二公言事
剴切嘗建國人暨諸部既誦周孔書當尊諸母以厚彝
倫兵家子驕脆有孤任使庶人挽強蹶張老死草野當
建武學武舉儲材以備非常時雖不用識者韙之至於
論刑一本哀矜嘗言死罪遇赦且原減死流徙未蒙殊
渥當驗情遇恩內徙漢人滿百執弓矢獵者不及百者
流條格已有禁弓矢聚衆之條又復為此是錯綜網羅
之誠恐愚民舉足蹈罪至論建德民妻之不首夫死者

則當以必死其得用法之意乎國家涵濡百年譽髦斯
士公先世已事華學至公始大以肆為文精核務去陳
言師先秦兩漢尤致力於詩凌轢古作大篇短章無不
可傳者與脩英廟實錄譯潤皇圖大訓承華事略編集
列后金鑑千秋記若干卷至順間龍虎臺應制賦詩有
玉食之賜嘗進擬藁為之歎曰孰謂中原無碩儒乎文
集若干卷臺檄刻之揚州郡庠仁皇始行貢舉國人而
下列為四色國人洎諸部為右榜試目視左榜差優公

雖右榜左列及之者指未易屈焉且其為學初不為貢
舉也以挺特之資丁大明之會衰為舉首馴至達官威
重足以鎮薄俗文章足以追古作議論足以正風教設
科得士不得不以延祐之間為盛也不幸壽僅六十未
究其用悲夫銘曰

元大一統六合同風南臺北萊苑生其中部族有儒文
貞伊始文貞之世翼翼廟祀後承聿脩講學諸夏延畀
至公有大無撙嶄然異稟幼不事弄濡衣撲燎智劇碎

甕益習以進益混以澣不溺於流而登於岸先秦兩漢
華咀實擷天籟冷厲石湍激冽天子有詔乃興乃賓實
三其魁一推國人甫試館職修義豸冠以爾柶鑿安我
考槃遐心浮雲束帛空谷春坊翊贊經筵啓沃皇格於
天公司其度俊造鑑衡風紀砥柱厖恩異數川委充溢
云胡脩途六十而柅既易其名亦大其封於光之原賜
碑崇崇賜碑崇崇於赫厥銘同年之紀考信匪誣惟爾
部族文貞有躅敘倫敦典益介戡穀

元故右丞相克埒公神道碑銘

并序

天厭宋金之不能君其民也篤生大有為之君以君之
我太祖聖武皇帝順天應人龍飛朔方豪傑雲從四傑
而下儼功輩出若丞相扎哈蓋較著者也五世孫僉河
北河南道肅政廉訪司事哈斯狀其故請曰丞相奮庸
天造名具秘史世莫得聞子孫席世少文封謚無稽諸
麗牲有石而無銘封謚在官銘不在子孫乎敢再拜請
愚昔長史館與脩功臣傳家報䟽列至有炳炳在人子

孫不能具一言一事者竊嘗撫其後而悲其先也僉憲
殖華學穎出羣從思弘世德嘉其能後故不讓而筆之
丞相名扎哈即清哈系出克埒氏或曰本田姓至朔方
始氏克埒曰實克埒族時同名者三因主屯田故加田
別之有勇畧善騎射從征屢有功歲丙寅長百夫從宗
王百官於班珠爾烏納噶河同盟恭上太祖清吉斯皇帝
尊號倚注日密晝不釋鞍夜不解帶為扎爾固齊征太
陽國賜御馬一破曲出國汪國魯國賜珠旗金虎符銀

印為埒里巴總屬官金符十人銀符五十人征塔塔爾
欽察唐古哲袞回回契丹女直皆有功承命闢烏梁海
等地為屯田且城之因公名名其地曰扎哈又曰清哈
俾公守焉局所俘萬口居作後以其半不能寒者移弘
州孫達哈察襲監弘州及其局風宜春稼屑供天庖若
諸樹藝為設提舉以司之亦以公子孫世其職時諸蕃
畧定遂南牧至撫州與金將呼察和斯戰流矢中右脅
給其衆謂不傷裏瘡復戰竟拔其城賜白金俾為後證

既拔燕都命公登大悲閣環射四矢所至市舍悉以賜之尋受顧命奉太宗登極收天下符節獨公聽留復以貴戚金符官隸麾下拜中書丞相偕塔齊爾獲布特取汴京河南河中

闕

得九龍旗乘輿椅蓋悉以賜公

中原既定錫恩州三百戶為實封世食其賦為置官守始立中書省尚左公為左丞相繼尚右改右相歲乙未八月二十一日薨於家上惜悼不已賜金幣治喪命百官致祭葬弘州北阜立祠其上憲宗嘗拊髀嘆曰使吾

得扎哈江淮何憂惜其亡矣世祖立極又以公舊部獲降虜千人為珪齊命公之孫章嘉為千戶曾孫伊勒布哈為百戶世所謂十七投下此其一也在干戈中每以進賢為急河西得伊勒吉齊匠官德磋後其子皆為名臣陰陽德丹仕至大司徒得儒十三人後皆知名夫人摩爾奇特珍太祖所賜嬪妃也初克蔡俘金公主某亦以賜公子男一十二人曰約蘓穆爾為札爾固齊佩金符札爾固齊之曾孫托和齊婁珪齊千戶玄孫保保襲中衛

千戶曰博鄂斯從世皇有功雲南為濟南益都宣慰使
曰克埒濟蘇僉憲高祖也孫若干人曰八十八僉河東
道廉訪司事阿勒坦布哈淮東廉訪副使曾孫托里靖州
路達嚕噶齊僉憲大父也子孫繁衍碑不具載世有恒
言飲水黑河最為勲舊公實與焉國史曰托卜齊雅至
秘也非有功不紀公名在焉錫戶樹官傳之子孫祖宗
來可屈指公則二焉即是觀之豐功盛烈雖家乘紀述
容有逸畧而其皦然大者不可掩也銘曰

雲雷經綸屯將作解元氣鼓動大塊斯噫豐隆屏翳相
為後先亭之毒之以基我元於赫代工開天伊始同盟
黑河有如白水轍環扈征何堅不摧戰功曰多我實有
之珠旗揚揚金符煌煌從官如雲君賜以彰天荒既闢
有城翼翼樹藝告成百工以集郢律回春奏食靡艱俾
爾子姓世尸厥官族鋒雖利吾忘吾脅恬然不傷嬰鋒
蹠血拔燕論功旌以殊禮四矢所至悉公之邸帝曰汝
賢其長中書汴蔡底平金社遂墟眎功頒賞賜戶三百

世掌食采有官永額不憊首離優游考終九重震悼賻
腆祭豐弘惟桐鄉庸昭崇報有穹其封有恤其廟秘史
紀名永終不墜顧是刻文益示揚厲

大元故贈光祿大夫江浙等處行中書省平章
政事柱國追封趙國公阿都哈雅公神道碑銘

并序

江南行臺御史大夫阿尔斯蘭哈雅致政家居遣其子都
水少監摩歡奉家乘請曰老夫賴先世餘澤竊祿位有

年而吾父平章公墓尚未表非慢也顧盛滿難居功名

鮮終恒懼不克負荷遺羞丘壠君恩如天幸賜骸骨養

痾田里年且八袞吾知免夫子知我其銘之有士讓不

獲本其狀序曰平章公諱阿都哈雅輝和尔氏世為高

昌望族祖伊羅勒鄂斯蘭登達登達華言巨室也贈中奉

大夫河南江北等處行中書省叅知政事護軍范陽郡

公祖妣鄂特戡追封范陽郡夫人考諱哈喇阿尔思蘭登

達當太祖皇帝肇建區宇國主邑都護發兵攻金斬其

長史聞摩勒齊尔有異遣將命偕察喇四人馳告行在且具款誠上曰果如爾言其告爾主以方物來對曰皇帝幸生活高昌高昌身且不敢有何有方物復命輦寶貨金織段以獻由是高昌內附因留宿衛從太祖南征卒於柳城贈資善大夫湖廣等處行中書省右丞上護軍范陽郡公妣雅克塔納追封范陽郡夫人公宿衛積勞除塔山屯田打捕提舉不就卒於京師昭回里第年七十葬城西小南莊之原贈光祿大夫江浙等處行中書

省平章政事柱國趙國公配巴哩琿塔噶封柳城郡太夫人卒於濟南年八十四大夫時長憲山東護樞歸附子男二長大夫也次賽音哈雅同僉宣徽院事早卒嗚呼世臣大家上有啓而下有承得以世濟其美者公一門其庶幾乎公性恂恂而志趣超詣由近侍出官非其志也嘗曰我先人有大造於高昌氏子孫必有興我不必為也夫以右丞之賢明畏天之義一介往來舉危亡之國而措之安遇知太祖天苟引年居高位享厚祿必

矣乃鬱而不發蓄而不泄至公又植而不食必再世而後顯是蓋遲速之有時非人力之所能及而啓之於前者固已逢涌而不可遏公卒時大夫已拜南臺御史流澤之來浩乎其沛然矣其浮雲富貴優游以老宜哉大夫以卓越之才起家監縣為良吏入臺為材御史出廉諸道為剛明使者入中書分南臺為天子重臣歷九朝官二十七轉天下識與不識皆知其名而又躬服儉素衣無錦繡居無華飾榮寵方至退然若虛文皇嗣位聖

眷益隆玉帶上尊錫賚相望至為玉刻署押以示殊遇
當是時苟假寵於上為先世要美謚作豐碑亦何求不
得顧乃自抑若不能加於其先有於其身者必遲回以
待於致事又遲回以至於今日不請於上不謁於太常
擇所宜為者自為之視世之朝暴貴而夕驚賜碑者有
間矣二子長少監也次伊祿哈雅少監二子布格博遜
俱宿衛內廷公生世為賢子為賢父歿而享其寵嘉出
於尋常身大官無聞者萬萬也其可銘也夫銘曰

於維趙國作德於逸而小心以繹不柔以忼不競以亟以承
其先烈以裕其嗣息其先伊誰實為右丞子子其征屬
屬其盈高昌之望曰命靡常主命不辱而天威肅將輦
其金珍篚厥玄黃歸我聖皇以救寧一方大夫繩武不
遠伊邇右丞有孫趙國有子坦坦如砥矯矯如矢維天
子使靡不極所止宜爾錫爾山峙川委繫來世之祉城
西之原有樹有封刻銘豐碑百世可宗

故承務郎江西等處儒學副提舉葉先生墓碑

承務郎江西等處儒學副提舉致仕葉先生諱瑞字宗瑞遠祖祖洽宋熙寧間廷對魁天下曾孫廷秀由邵武徙建昌新城春秋擢第官至朝請大夫知梧州言事忤旨仰藥卒子遠宣教郎奉樞歸次采石而溺孫茂祖甫四歲母饒夫人抱以依姑趙趙居而教育之因為金溪人中鄉貢進士舉娶趙生四子先生其叔子也幼尚氣節致力經學以及百家皆得旨要其為舉子業不蹈時習或戒以希有司旨先生曰吾為是區區而悖吾師說

乎益篤志為己之學進士公卒先生甫冠貲產悉分弟
妹而躬耕以食趙夫人卒兄弟四出先生獨力營治久
乃幡然曰昔親在不敢離親亡矣充吾學為揚顯者不
力可乎歷甌越會稽瑯琊涉汶泗過洛入秦道晉以達
幽朔無所遇最後至遼東世臣洪氏以好儒聞聞義學
方難其師有以先生文行言於平章君祥右丞重喜者
及見大悅館而師焉諸子彬彬以文學濟其世美遼東
之人翕然知向學者先生力也朝廷以右丞薦授遼陽

路儒學教授再調大寧路陞將仕郎江洲路湖口縣主

簿攝尉事盜久逸者皆獲之憲司檄按德化縣疑獄即

得其情覈虛糧決滯訟縣以治聞轉撫州樂安務提領

俄請老授前官至順二年十一月二十五日以疾終於

家壽八十有五某年某月某日葬某處娶趙氏生子順

女適孔景仰繼黃氏生子升寧都州夏河寨巡檢女適

湖口縣典史杜復亨繼王氏生子大有廕宜春揚橋務

提領女適高安白沙寨巡檢孫鐵柱孫男三人縝綱繹

女三人先生年五十始出卒能致官而行其學迹徧海
內乃得返鄉里至於休致而終於正寢雖用不盡其施
而教之振於東善之淑於人者多矣遺文四十卷庸學
提要六卷周易釋疑十卷於虜博矣哉中原貢舉廢將
九十年江南亦四十年某少時先公教之曰金源分裂
且事貢舉國家之大未有不行但遲速有時爾力學以
俟當有際也時混一才二十年故老尚多幸及從學粗
有得也尋以校職從事山北憲貢舉詔下乃棄而應薦

先生實主文遼陽科制廢久內地有所不悉遼陽在東
僻有司一切昧於奉行先生纖悉教之蓋江南內附時
年已三十餘矣習於場屋條制者也監試僉憲田時佐
曰微先生幾不能奉詔有士既獲薦文入禮部經問之
輿策問之切見者莫不駭異先生在湖口方鳴金鼓行
江有士歸省臨江遇之中流歡甚至順庚午有士為兩
淮轉運使先生惠然肯來年八十四矣飲食起居猶昔
也手寫大學中庸二書注字如蠅頭以與小兒留月餘

歸明年遂沒又八年升來武昌請銘將刻之阡茲銘也
其誰宜為銘曰

於虜先生志壹學醇友善行道恥為鄉人昔隘分裂佔
畢苟安四海既一我轍乃環有韞未褫賈用不售爾不
我知我不爾覲晚慕幼安片帆遼東有命自天臯比界
公俊造賓興墜緒孰繹紹遠選公張此東僻樂育嘉惠
侏離伊吾糾邑司征曷究我書八十五年口不藥劑禔
身所遺根茂實遂旅無所容道路屏營歸來正首於虜

先生

故通議大夫江西等處擁茶都轉運使萬公神

道碑銘

并序

公蒙古耐準台氏小字萬嘉間長因為名國俗也既華
學友字以國卿其家廣平蓋曾大父天造初穎右部分
戍地也大父浩善從討李璫攻襄樊鄂渚皆有功贈中
順大夫同僉樞密院事上騎都尉范陽郡伯配欽察氏
葉氏皆追封范陽郡君父孟克圖右衛親軍百戶達魯

噶齊佩銀符陞福州新軍千戶達魯噶齊佩金符贈亞
中大夫僉太常禮儀院事輕車都尉范陽郡侯配欽察
氏追封范陽夫人德善履歷具神道碑公守河間有士
待罪政府江西茶政不脩擇習而健康而通者為都轉
運使以拯之公嘗貳其司有聲乃薦之廷議翕然既奏
可傳符至郡俄以疾卒至正二年四月二日也五月二
日葬曲州縣先塋壽六十有五明年九月孤壽安走安
陽謁銘哭不能禁拜已出行實復咽不能語有士交公

厚望其孤已泣又洞其慙誠益為之動遂相與大哭久

乃始克讀其狀其善狀不能悉也公居嫡長世祿當襲

以讓弟諾海服勞宿衛除山北道肅政廉訪司照磨兼

管勾承發架閣庫以太常憂歸服除調山東道賑饑有

功南臺辟為行人俄除利用監知事又改南臺管勾承

發照磨兼獄丞拜西臺監察御史論列剴切僉雲南諸

路肅政廉訪司事麗江宣撫達魯噶齊揚珠布哈

闕

逐同官激判郡內朝廷知之始懼而亡匿公以計

闕

出

罷之復其同官者以息行部建廟學凡二十四所脩廢
驛二十一歸省太夫人京口及侍其疾扶柩至廣平復
如京師遷祖考妣合葬先塋改僉江西道又改燕南皆
以憂不起服除改河南道天歷之警行省臣與廉訪司
協議公謂潼關守不可緩承制除河南行省郎中出守
潼關文皇道汴錄其勞除河南道副使潼關失守夜馳
至行省發蒙古軍四千人又借民丁出帑資假富室以
足軍興鼓行而西遂復奪之會朝廷遣使退其師還卒

掠民子女皆奪歸其親賜綵段上尊初額森將兵禦西師屯彰德約備芻粟已竭宿留不進士卒將大肆掠公開諭以理遂移衛輝境蓋始約有備之地一郡幾亂賴公以免擢同知中政院事理財江浙仍有金帛之賚改儲政院判官拜監察御史按覆諸道風采肅然為戶部郎中楮幣壅滯督焚以通之倉儲積弊立法以覈之閩中去京遠選人間闕故事三年遣使即江浙省銓授公以選行就除行省左右司郎中茶司復立授同知江

西等處摧茶都轉運司事分治湖廣江西江浙課以登
商旅以通官庶以不擾入為戶部侍郎復通州倉糧三
十萬石行蜀拯鹽法之弊人謂得宜陞內宰甫月改河
間路總管兼諸軍鄂囉總管管內勸農事首建學宮若
干楹百廢脩舉胥畏民悅摧茶劇任知公者咸謂必稱
而倏焉長往惜哉積階自將仕佐郎至通議大夫配沙卜
珠氏封范陽郡夫人又娶趙氏在南每憂無子有壬解
之曰以子之心不患無子後果生子壽安也愿而有立

室而有出公可無憾矣女四人適國子生旺札勒布哈江
浙行省理問瑪固德勒宿州同知王敏行一未行第二
人諾海自襲官有聞四轉至鎮江上萬戶府達魯噶齊
階太中大夫曰庫楚宋氏出也公幼有志節襟度宏朗
滑稽微中機鋒叵測分部上京它曹官莫不舍其署雜
還相從其為人悅慕若此而疾惡若仇辭色不能隱亦
用是來議者之口焉左警巡院判官王克觀泊其家五
人相繼死為俱載歸葬之道高郵十路都萬戶府知事

龍寶臣出使卒殯水濱捐金顧江道士遷其柩歸葬曲
周顯官有放其子者孫且十歲一日過之因言父子天
倫甚至乃感然問曰君子幾歲公曰尚少當令來拜明
日挈其孫往其人撫愛不釋公曰此兒與君有骨肉親
錯愕久之乃語之曰此君之子某之子也遂大慟奉楮
幣銀酒具為謝受之還遺其子卒為父子子今亦顯微
公則天倫或幾乎絕矣其篤於行義若此與大權貴舊
而狎不敢遠亦不近之免趨附之逮其讀書好文蓋太

常教之有素而復天資穎悟喜交儒士灼然有見於道
義故確然無間於吾徒也山北南臺暇必相從有酒必
共先太夫人棄代惟揚自京口來賻南歸過之戀戀不
忍別騎送至金陵東郭始泣而歸中途宿旅邸疲甚而
寢必詔臧使寤笑談達曙目不少瞑翼日神觀不少昏
疲京師僕僕多事亦撥冗過從又同扈上京交游厚且
久它人不及也銘復有辭銘曰

有紫其服有金其符賞延在身乃及友于視其不取見

其有餘紆青幾時冠鐵衣朱逢涌孰禦載馳載驅投紱
滇池萬里接浙嘗藥視舉獲殫子職衰經存命禮經是
式分節河南邊聲孔劇力障其衝旋復其失兩為地官
不競不綵廩枵而充泉壅而流惟瀛大郡實為甸侯先
教後刑學宮以脩昔貳茗政衆與能事俾長擁司以脩
厥廢輶方脂牽奄忽云逝聞者盡傷矧予夙契子銘不
愧子善實多剛而不虐從而不阿不膠於習不流於和
有美承家其冠已我曲周之澤發於盈科刻文樂石百

祀不磨

圭塘小藁卷十

謹按卷九第一頁後一行托克托舊作脫脫又特穆爾

布哈舊作帖木兒普華今並改 後二行庫庫舊作

巖巖今改 後四行托歡舊作脫歡今改後倣此

後六行阿老罕舊作阿刺罕又扎拉爾舊作札刺

兒今並改後倣此 後七行博綽舊作撥澈今改

後八行伊埒肯舊作也柳干今改 二頁前

二行塔本舊作塔拜又默埒舊作減列今並改

後倣此 前四行雅爾堅舊作岳里吉又庫克

楚瑚土克圖舊作濶出忽都禿今改 前八行阿拉

克忒爾舊作阿藍斛兒今改後倣此 後一行呼爾

都海舊作渾都海又阿哩克布克舊作阿里不

哥今並改後倣此 後二行噶必齊舊作合必

赤今改 後七行錫喇瑪勒舊作撒里蠻今改

四頁前八行托多固庫勒呼圖克台舊作脫

端濶濶倫忽都台又伊遜忒爾舊作也速迭兒今並

改後倣此 五頁前二行呼喇珠珪齊舊作忽刺出貴

赤又巴哈穆爾舊作八合謀又塔齊爾舊作塔
察兒今改 前三行哈喇哈遜舊作哈刺孫又
額爾吉納舊作也兒吉尼今並改 十一頁後
六行安圖舊作安童今改 十二頁前八行伊
蘇特穆爾舊作玉速帖木兒今改 十三頁前
一行圖們岱爾舊作圖滿迭兒今改 二十頁前
七行布達實哩舊作晉荅失里今改 前八行伊
呼特穆爾舊作月魯帖木兒今改

卷十第一頁後七行永古特舊作雍古又錫刺濟蘇

舊作錫里吉思今並改 二頁前一行烏呼訥舊作

月乃合今改 六頁後一行克埒舊作怯烈今改後

倣此 後五行哈斯舊作赫斯今改 七頁前三行

扎哈舊作鎮海又清哈舊作稱海今並改後倣此

前六行班珠爾舊作班竹又烏納噶舊作兀那黑又

清吉斯舊作成吉思今並改 前七行扎爾固齊舊作

札魯花赤今改後倣此 後一行埒里巴舊作閭里必

又塔塔爾舊作塔塔兒今並改 後二行搭袞舊作只

溫又烏梁海舊作兀里羊歡今並改 後五行達哈

察舊作塔哈察今改 後七行呼察和斯舊作忽察

忽斯今改 八頁前三行塔齊爾蘇布特舊作塔

察兒雪別歹今改 後二行章嘉舊作莊家又伊

勒布哈舊作也里卜花今並改 後四行伊勒吉齊舊

作亦吉兒赤又德磋舊作得崔今並改 後五行德

丹舊作得田今改 後六行摩爾奇特珍舊作減兒

吉真今改 後七行約蘇婁舊作要束木今改

後八行托和齊婁舊作脫火赤龍今改 九頁前一

行博郭斯舊作孛古思今改 前二行克埒濟蘇舊

作潤里吉思今改 前三行阿勒坦布哈舊作按攤

不花又托里舊作脫烈今並改 前五行托卜齊雅

舊作脫必赤顏今改 十頁前五行阿都哈雅舊

作阿塔海牙今改後倣此 前七行阿爾斯蘭哈雅

舊作阿思蘭海牙今改 前八行摩歡舊作忙歡今

改 後四行輝和爾舊作畏吾兒今改 後五行伊囉

勒鄂斯蘭舊作玉龍阿思蘭又登達舊作都大今並

改後倣此 後七行鄂特戡舊作月禿堅又哈喇阿爾

斯蘭舊作哈刺阿思蘭今並改 十一頁前一行摩勒

齊爾舊作滅乞里又察喇舊作察魯今並改 前六

行雅克塔納舊作燕帖倫今改 後一行巴哩琿塔噶

舊作八刺忽都哈今改 後三行賽音哈雅舊作賽因

海牙今改 十二頁後六行伊祿哈雅舊作月祿海牙

又布格舊作寶哥又博遜舊作寶山今並改 十六頁

後四行耐準台舊作耐溫台今改 後六行浩善舊作

忽珊今改 後七行欽察舊作奇徹今改後倣此 後

八行孟克圖舊作慕克篤今改 十七頁後三行諾海

舊作那懷今改 後七行揚珠布哈舊作燕只不花今


改 十八頁後一行額森爾舊作也先尼今改 十九

頁前四行鄂囉舊作奧魯今改 前六行沙卜珠舊作

珊竹今改 後一行旺扎勒布哈舊作完者溥化今改

後二行瑪固德勒舊作邁吾答兒今改 後四行庫
楚舊作曲出今改





總校官進士臣胡榮

校對官庶吉士臣陳墉

校對官編修臣沈清藻

謄錄監生臣薛翰

謄錄貢生臣張誠智

欽定四庫全書薈要

集部

圭塘小藁卷十一至
三



欽定四庫全書薈要卷一萬六千三百二十一

集部

圭塘小藁卷十一

元 許有壬 撰



文文山畫像贊

并序

有士早慕文山公風節與其孫富遊嘗序公傳而未得
拜公像意其雄傑峭異若太史公疑張子房為魁梧奇
偉也富弟實奉像求贊始遂瞻拜乃溫其如玉焉然其

栗而廉者不可揜也仁者必有勇公之謂也贊曰

精金不蝕貞玉不磷昆岡火炎乃流乃焚不流不焚孰
為其真摧抑百至而力不衄間闕萬狀而氣益振我公
之心有如此水我人我民我疆我里獨有入海萬一振
起天實厭宋臣力竭矣慷慨就俘氣言益厲談笑燕市
取義得義一言一動足為人師若曰父母有疾不可以
難愈而不藥則百世之訓彝厚顏鄙夫偷生一時死何
所遺壤腐冰澌公乃不死孰得而死之予今見公圖繪

固嚴霜烈日之梗槩而景星鳳凰尤足以慰後世快覩
之思也

雪樓先生程楚公小像贊

并序

有士昔來京師雪樓先生楚國文憲程公在翰林院一
再見之奔走四方不得日侍筆硯而知先生與議貢舉
之有力也至正丙戌十一月諸孫世京奉小象示有士
俾贊其左不敢以蕪陋辭也贊曰

楚郢故墟有樓岵岵世半知不脩阻孰探由公著稱嘉

名遂洽于朔南公幼為學演迤泓涵曾未施抒勝國已
戡楚材晉用乃獨挺夫梗楠持憲中外人革鄙貪掌帝
之制音叶韶咸和不徇物剛不來讒引年勇退秋風片
帆塵空萬事之擾擾雲護一室之潭潭松陰入座爐熏
自叅宛清揚其如在耳肅肅乎名談昔貢舉之始行一
廷議之二三天荒盡薙乎歲第鵠袍倏變而朱藍顧區
區之不才至襲公之冰銜雖拜圖懷人希彷彿於萬一
而度德量力祇足以重沙礫之慚也

澄上人龍贊

并序

今上皇帝躍淵桂林報恩寺時釋師澄實住持宸翰超詣師有功焉皇帝即位之三年召入朝恩數隆渥可謂希世之遇已有壬奏事明仁殿始識之將歸出墨龍求贊有壬既榮其遇而復有感於龍也為之贊曰

九淵神龍屈伸惟時有天者隨龍不自知其屈也獮獫皆得而嗤亦莫得而我危其信也飛在天而雲行雨施萬國咸寧而一物不遺怨不爾報德則爾追是蓋善善

急而惡惡緩又天心之仁愛而實寓至公之無私使子高而有知九原之下寧不深愧於我師也邪

雲林小象贊

蔡仲謙
運使

氣清而神完外癯而內腴御暴嬰難持志無撓劑繁治劇游刃有餘身已瘁於駁歷友方樂乎樵漁經費需才鋒車突如曾未期月山積海輸鳳池訐謨其席屢虛吏垢待刮而民瘼仰蘇清泉白石雲樹茆廬胡為乎歸歟

如愚先生畫象贊

并序

仇侯公度守晉寧政成歸燕燕其里也復命典大郡力
辭於未及之年平生慕古人假古物以寓其意又自號
古愚聞於時一日詒書某曰吾友胡助亦古愚也茲以
古愚獨歸胡而更曰如愚客有工繪貌予惟肖微子一
語其勿靳夫名而字古也復冠以號今也滔滔雷同焉
得而避之昔有同姓字於一時若杜子夏者未聞易而
避之也字且不避况字之外者乎何獨公度介然自別
於胡哉予始聞而疑之即其號求其志而後有以見公

度之力於進脩而其志有在也末世滋偽聖人發古愚
今愚之歎以其挾私妄作又不若徑行自遂之為疾也
如愚顏子也聖人與言有聽受無問難蓋其真積力久
觸處洞然但見其不違如愚退省其私則皆足以發明
夫子之道然後知其不愚焉公度慕古人者而非古之
愚者也慕古人而師顏子有餘師矣自古愚而為如愚
自如愚而為不愚得之於心有不可名者已號與象云
乎哉贊曰

謂其不愚黯乎其外謂其果愚皦乎其內以為古之愚則思不暗昧而行不自遂生乎今之世尚論古之人而無愧左圖右書以游以藏淵而時出網而日章樂不可名號孰爾臧殆將造夫心齋坐忘之鄉者乎

銘

守約齋銘

孟傳孔道三聖以承孟舍何人乃謂似曾因其養勇無懼為主擬非等倫氣象是取不能必勝是亦得要守氣

一身寧久無暴反身循理是為守約猶網在綱猶機度
括循循善誘亦惟以禮推而施博能事畢矣

亦山堂銘

并序

贈江浙行省叅知政事北山徐公吾鄉之耆英也仲子
漢臣掾中書以兄周臣入為叅議改他官名與秩日起
拜御史出僉兩道皆有聲周臣卒無子棄官歸經理其
家且以子後之先塋久不治樹築有加表碣儀物礮石
林立凡周臣齎志地下者舉畢之可謂能子弟矣遷浙

西道以母老不赴日相過從承示伯生虞學士所為亦
山堂記乃知漢臣抒義北山而自號亦山請益惟謹漢
臣孝於親弟於兄根本既立而又有伯生之文蔑以益
之矣辭不獲乃為之銘曰

繫士為學奚假外求世美克濟厥德允脩家有餘師巖
巖在前重厚其體振古不遷含雲蓄雨利澤由施在人
取象子孫以之止而有容器車攸出皇皇乘輅以嗣以
續吾翁此山吾亦此山予美于牆有儼堂顏師不在人

乃在吾翁義不在山乃在吾躬隱鄙捷徑產或興寶跬
步或違壑譏峯誚勗哉繼志毋虧一簣山亦子名人亦
子畏

辭

哈斯布色哀辭

哈斯布色取父字姓丁字文苑于閨人與予同登乙卯進
士第倅固安州掾左司除禮部主事予佐吏部故游從
為多改秘書著作拜監察御史又與予同官南坡之變

梟獍黨與列據津要文苑喀爾子山暨予闕同論列遷

闕

同論列遷

戶部員外郎予在左司計事率相見俄僉浙西道廉訪
司事遂間南北予居武昌適移湖北新制憲官各色止
用一人長憲者同出西域即日引退臺報不允文苑曰
無例且退持疑文冒進可乎堅卧不起予跼居絕人事
獨相往來鵠山楚觀之絕頂梵宮琳宇之僻地荒城廢
壘村居埜池靡不至焉時絕天登大別宿郎官湖賦詩
談論無虛日一日把酒相属曰人生離合有數君閒我

退機適相投但恐造物見妬不終遂此先子監祁陽縣
有惠政潛德未章子亟銘予不獲辭焉未幾予除兩淮
轉運使文苑移山北邸報同日至山北置大寧白雪地
去京師東北尚八百里陸不可挈家水縈紆餘五千里
扶病擁幼殆不能為謀予官揚州崎嶇來過曰我非瀆
於進也主上新政不敢不行而老幼累我且都而杭杭
而鄂鄂又山北有力且疲况貧乎鄂不可留揚米貴不
可居杭吾樂之穀又差賤且其人德我吾謀定矣廼命

諸子買舟而東獨挈一小僕乘傳而北予留之飲三晝夜而後去酒中嘗曰我作事素勇今殊猶豫何也予戲之曰人改常不佳君豈厭世邪廼大笑曰昔溫公記宋子才暴謚其言偶驗我不信也因出臂示其堅實曰斧吾擊亦不死也於虜今廼真死矣蓋時方大疫暑行至東平主僕皆病歸抵淮安卒於舟中至順元年六月二十三日也郡大夫率其國人載之予既為位哭遣人省其墓告其家子穆蘇迎柩歸舺舟餞別愴地哭為之慟

監郡公葬祁陽遠不能祔予欲蜀岡買地處之穆藕曰
杭西山先人所愛因可守也遂謀葬焉母子力不能舉
漕司暨它官府若嘗往來共賻之得楮幣中統餘萬緡
既襄事可經理其家淮東憲長達爾瑪嘗同官閔其貧
請賻於朝不報初文苑為固安隸京號難治民劉奉益
橫甚賽祈烹五十羊聚羣不逞震動里閭執而發其椎
埋焚剽數其事度不解逸去反肆誣構詔大官雜問禁
中辨析明直劉寘於法築堤堰三百里河以不害兩道

凜然折強暴如拉朽蜀兵未戢按郡直要衝布置施為
若老於兵者統兵省臣薦其有將帥材可治邊事云內
外持憲知無不言制吏輩噤不得出一語平居論事慷慨
歷落一座盡傾遇則奮發勇往無前長於觀人某邪
某詐默以相告後輒多驗作歌行豪宕如其人古詩清
粹皆可傳也延祐初朝廷始以科舉取士天下之大才
五十六人出官四方或懦於施或汙於賄歷歷在人得
免詬議如文苑者無幾而天復中道畫之於戲惜哉予

昔銘監縣公謂其多善未報當在文苑今文苑壽才四十有七齋志以沒此又何邪豈天又尼其身而大其後邪天道是邪非邪予益惑矣嘗獨坐閱同年錄十六年間為鬼錄者十七人矣尚忍以區區聲利置胸中乎或者視為四海九州之人忽然無情予不忍也穆藕將狀其行求予為銘而其狀不至為之辭以發其槩且以寫予哀云

天之生才兮亦孔之艱前不知其幾世兮後復幾年何

林林之百萬兮獨靳於賢器方適用兮陶復不堅雲未
雨而掃蕩兮華未實而摧殘豈矰繳之在天兮惡有翼
之高騫冥冥之中兮孰司其權昔君之北兮歌呼水壩
今君之來兮丹旌翩翩藥膳匪良兮道路迤邐妻子睽
隔兮良友棄捐我哀曷忘兮我言曷殫西山蒼蒼兮惟
所便安玉樹森立兮澤流有源冀伸於後兮以報其前
破不可完兮逝不可旋惟生無愧兮雖沒猶存脩短有
數兮吾其舍旃馬革牖下兮非蟻則鳶九原有知兮其

然不然

圭塘小藁卷十一

欽定四庫全書薈要卷一萬六千三百二十二

集部

圭塘小藁卷十二

元 許有壬 撰

跋

跋織成宣和御書清淨經

唐安樂公主出降益州獻碧羅為花鳥大如黍米眼鼻
觚甲皆備瞭視者方見之陸龜蒙紀錦裙謂其禽鳥花
卉諦視條段斬絕分畫縝緻不可狀雖不可見想像不

過景物精絕而亦疑其夸也若夫字畫見諸組織者大率僅能成字而筆意則未易得宜相張君藏織成宣和御書常清淨經一卷筆意之精不失毫髮機軸之異又有不可名言者面文背質判然二文而吻然一層不知當時之工何以施其功於機軸之間也因知碧羅錦裙非夸而又有不及者雖然奇則奇矣特一物爾而予因是深有感焉宣和間萬事已墮清淨經謂神好清而心擾之心好清而欲率之遣其欲而心自淨澄其心而神

自清嗚呼斯言足以為國矣知而不能踐徒從事組織之末祇增其多欲爾故予不暇論組織之工而深有感於是焉是卷出沒之詳同年歐陽原功叙之矣其己卯冬與予同觀蓋庚辰冬也

跋重刻羊祜碑

墮淚碑在天地間與元氣相為無窮昔之亡也有不亡者存蓋立德立功立言有一於此足以不亡況備之者乎太傅之未就交辟也郭奕以為今之顏子其德之著

見者若此委質而後大勲偉績史不勝書其功懋矣若夫論三年之喪欲革漢魏之薄而興先王之法以敦風俗其於立言蓋有儒者之風焉使及孔氏其殆庶幾乎陸抗謂樂毅諸葛孔明不能過未足以盡之也李商隱因韓子淮西碑有言湯盤孔鼎有述作令無其器存其辭辭之精絕者不託於器且不可泯况德之浹人肌骨者乎昔太傅造峴山言自有宇宙便有此山余謂但有峴山便有太傅且人皆因碑而傳是碑由梁及今至於

四刻則因有以著不亦異乎訪舊文而刻之石由京師而致之峴首者編脩官楊伊志卿也

跋顏魯公墨蹟盧侯帖

顏太師風節傑出千古脫翰墨未盡善思其人撫其蹟猶當寶襲齋沐九頓首而後展視况畢天下之能事者乎世饒饒有真偽之辨苟稱太師予即寶之况仲謙尚書所藏盧侯帖其為真蹟昭昭無疑者哉松雪翁以平生見十六帖為幸其所稱馬病帖則予得之又獲觀此

帖是亦幸之又幸者也

跋陳尚庭告

唐天寶三載開江縣尉陳尚庭告一通一時擬官者四十九人湮沒不稱者多矣而署銜於首者李林甫也林甫之惡千載不磨雖欲如當時選人之湮沒不稱不可得也吁可畏也哉

題

題歐陽文忠公告

文與道一而天下之治盛文與道二而天下之教衰經籍而下士之立言力非不勤也辭非不工也施之於用卒害其政者與道二焉爾昔蘇子以韓愈配孟子而以歐陽子配韓愈天下以為知言後世無敢有異議者韓也歐陽也推而達於孔氏之道也歐陽子曰三代而上治出於一而禮樂達於天下三代而下治出於二而禮樂為虛名又曰我所謂文必與道俱嗚呼此歐陽子之所以為文而先儒謂自荀揚以下皆不能及者也有壬

幼讀其書即知好之見其紆徐委備容與閒易初若易
入望洋而嘆而後知其大且至也翰林直學士兼國子
祭酒玄原功其後也登延祐乙卯進士第名能為古文
潁州後子孫散而四方能世其學者原功爾出所藏至
和元年五月告身示有壬曰太師為龍圖閣直學士尚
書吏部郎中留守南京時罹太夫人憂服除以舊職除
此其告也陵谷變遷歸然獨存傳而至玄玄也歷冑館
奎閣奉常太史幸不至墜世業子吾同年其為識其左

又曰子以叅議中書省事母憂去官服除亦以前職召
古今事有相契者其併記之有壬早讀歐陽子得與其
後同年而又相好故敢以謏聞識之若夫德業之不究
而以迹之粗類者委之豈原功私我之深遂忘其擬人
以倫而傷其知人之明邪將原功警我以希賢之學邪
警我以希賢之學也則不敢不勉

題李士誠持信手卷

說文曰印執政所持信也劉氏釋名曰印信也所以封

物為驗也亦言因也封物相因付也大抵皆有官者所用隨其職給於上後世人始自為今易水時有得大不過三五分其文率不同他出諸土者班班可見皆私作持以為信者也然莫盛於近代士大夫簡牘題詠既書姓名必繼以印哆然標榜以為粉澤予素疎但書姓名乃有刻而見贈因求印其上者甚至有假為者厥後馴習積至盈篋蓋不能免俗焉時之所尚若是雖近文事其亦文之末也夫世稱圖書甚無謂實印爾其控用銅

若象若木之堅緻者惟舉世尚之故製作日精然皆出
江南北工未聞也吾鄉李士誠是藝之精無愧南工蓋
其翁學於江右文生而士誠傳其家法焉求扁室顏本
之說文以持信扁之且使知其槩庶不為俗工

文

武昌新居上梁文

伏以廣廈千萬間尚欲芘寒士風雨束書三十載始能
有京師屋廬昔賢負山斗之名終身無樓臺之地迂踈

涉世我何人斯因循為家知幾年矣朝臺暮省已多索
米之譏春誦夏弦靡獲棲身之所舉室每安於薄祿斯
言可質於上蒼徒費伯氏之貲莫制中人之產葦門圭
竇揣分自宜畫棟朱門效顰奚暇身常走俗難求却超
之辦資才乏驚人敢慕文昌之買宅但未克高飛而遠
走又不能穴處以巢居跼蹐連房與在舟而何異紛紜
插架任充棟以莫容長者出庭幼或突面左足下榻右
已及階潦入則奧亦橫流雪積而勢將下壓幸人境得

一區之隙念農夫猶五畝之居天上歸來方欲采山釣

水人間走徧恰知問舍求田此邦較楚俗而差淳故鄉
如并州而在是臙脂入畫愴先子之曾留鳳凰來儀儼
前峰之如揖雲間紫闥晚景侵尋眼底青山中原咫尺
幸便途於桑梓爰從事於耰耨欲罷不能與奢寧儉叔
兮督斧斤之後深入山林季也司楨榦之勞實崇基址
拮据集事老子獨慚周旋相攸拙謀時與雖塤篪於率
作亦杖屨以遨嬉此蓋席世澤詩書之餘所以見今日

輪奐之美，樣題數尺，固得志所不為。堂構百支，以貽謀則可繼。如翬如跂，豈事外觀？苟合苟完，具存昔訓。上棟下宇，既成始有之功。前書後琴，行遂閒居之樂。言之不足，發而為詩。東黃鵠嵯峨紫翠中，堂有棣華庭有桂。從今無日不春風。南烟樹雲峰可並，參要就離明明。舊學肯將風物作清談。西江漢滔滔大別低，清晝憑軒時俯看我山。真是步雲梯，北家世柏臺曾種德。洎溪松柏鬱如雲，勿為安居忘祖力。上認取仰高真氣。

象一堂莫道止於斯堂外青天千萬丈 下玉樹芝蘭
多俊雅威獲趨承有不齊西銘要念同胞者

伏願上梁之後兄友弟敬直須學萬石君家資厚財饒
不必與千戶侯等自頌若此惟天祐之

圭塘小藁卷十二